

〈「你對佗位來？」〉

「你對佗位來？」

我對南部來。選擇，原來有一種無奈
親像佇家己熟似的故鄉流浪，有一種
講袂出喙的，悲哀。我是政治的傀儡仔
嘛是國家的棋子，定定毋知後一步
應該安怎演、安怎奕
生活才會簡單，日子才會平安
性命，袂輸漂浮佇闊莽莽的海面
看袂著彼葩光焱焱的照海燈

「你對佗位來？」

我對第15號押房來。佇這款恐怖的年代
連溫馴的月光嘛會予人關共陷眠
連權仔內的蟾蟲仔嘛會變共戇神
好佳哉，有時風絲仔微微
吹過來記持中的一陣芳味
親像故鄉的長流水，切袂斷
你我的相思。便若是遮邇仔
恬靜的暗暝……，我就會想起
你的長頭髮恰你的目眉
遐爾仔柔軟倚佇我的下頰
你講：「毋管世界有佻害

只要咱做伙，眼前就有好未來。」

這馬，只賸我家己，目矚金金
屍佇壁邊拏肚臍。毋知影明仔載
到底是意外會先到，抑是
拍痞仔光會對彼片的山頭，代先
艘出來

「你對佗位來？」

我對北部來。自細漢爸母無愛
公媽無疼，這世人註定菜籽仔命
查某人的未來據在人烏白掖
青春的美夢親像春天的花蕊
一目矚仔，花開花謝。我知影
我鑿目，我是烏趁趁的块埃
有人，隨時想欲共我摒掃清氣

「你對佗位來？」

我對流麻溝15號彼搭來。我毋是鱸鰻
只是因為一張白紙烏字的判決書
頓著紅記記的豆干印，戶口就按呢
遷徙佇遐。我是第一批
查某分隊的新生，編號32
時間恰名字已經無意義
是誰歹手爪？勅走我賸無佻濟的幸福

日子是毋是著賊偷？干焦留予我
 跤軟手尾冷，拖身拖命的惡夢
 若是有一工，會當好好來歇睏
 我會提出批囊內底，你的相片
 沓沓仔回憶：彼陣，咱踏基隆中學的宿舍
 好天好日的過去……，然後
 目睷瞞瞞，笑笑矣睏去

「你對佗位來？」
 莫問我對佗位來。窗外天星
 猶原閃遠遠，遠到看袂著我的月圓
 我自首、我配合，我的報告
 親像我的人，規規矩矩
 無可能隱瞞組織的代誌
 感謝官長諒解，彼工透早連鞭送我
 兩聲銃聲——銃殺暝日的掛礙
 是啦，我的身軀已經自由自在
 輕輕鬆鬆，泡佇ホルマリン藥池
 我的想法也已經消毒
 思想袂閣穢況別人
 過後，干焦向望团兒序細
 過年過節，拜拜的時
 會當佇舊厝大廳的神主牌頂，看著我——
 失落的名字

註：
 這是寫予白色恐怖時代的受難者，藍明谷、張阿冬翁仔某的一首詩。

藍明谷（1919--1951），高雄岡山人，臺南師範學校畢業，經由文友鍾理和的紹介，佇基隆中學做教員。後來因為牽涉「光明報案」，逃回岡山。警察揣無伊的人，就掠伊的老爸、伊的親情、甚至伊的某团。所致藍明谷佇1950年12月28日自首，最後關佇軍法處看守所第15號押房，1951年4月29日被銃決。銃決了後，軍法處並無通知家屬，煞共藍氏大體泡佇ホルマリン(福馬林)藥池，準備送予醫學院做大體教材。好佳哉家屬有探聽著消息，最後將伊火化焉轉去岡山。

張阿冬（1913--2013），臺北大橋頭人，1946佻藍明谷結婚，被認為協助翁婿逃亡，「知情不報」，判決感化教育。1951年5月17日送到火燒島，關佇流麻溝15號「新生訓導處」，是島上第一批的女性政治犯之一。1952年春，出獄，轉去到岡山舊厝，佇大廳看著神主牌頂翁婿藍明谷的名字，才知影翁婿已經無佇世間。根據中央研究院許雪姬教授的訪談，藍芸若（藍明谷、張阿冬的查某团）的口述資料：張阿冬往生進前，雖罔高齡一百歲，嘛是定定看著藍明谷的相片，喙內一直念：「我足想你矣，你趕緊來共我走走……」，翁某之情，使人感動。